

OEDIPUS OSTEOLITHOLOGICUS,
SEU
Dissertatio Historico-Physica,
DE
CORNIBUS
ET
OSSIBUS
FOSSILIBUS CANSTADIENSIBUS,
in duas partes divisa.

Opera

DAVIDIS SPLEISSII, Phil. & Med. D.
Gymnasii quod est Scaphusiæ,
Matheseos Prof.



Apud Joannem Rudolphum Frey / Bibliopolam
Scaphusiensem.

1701.



Petron. Arbiter.

*Fallunt nos oculi , vagique sensus
Oppressa ratione mentiuntur.*





S E R E N I S S I M O.

P R I N C I P I . A C . D O M I N O .

D O M I N O .

E B E R H A R D O .
L U D O V I C O .

D U C I .

W I R T E N B E R G I Æ .

T E C C I Æ Q U E .

C O M I T I .

M O N T I S B E L I G A R D I Æ .

D Y N A S T Æ .

H E I D E N H E M I I .

P R I N C I P I . A C . D O M I N O .

S U O .

C L E M E N T I S S I M O .

H U N C C E .

O E D I P U M . O S T E O L I T H O L O G I C U M .


O P T I M O . J U R E .

H U M I L L I M O . O B S E Q U I O .

D . D . C . Q .

D A V I D . S P L E I S S I U S .

DEDICATIO.



SERENISSIME DUX, CLEMENTISSIME PRINCEPS!



Erunt, ut antiquitatis splendor Plutarchus, memoriae prodidit, aliquando arietis caput cum *unico cornu* ad Periclem, magnum Athenienfium Ducem, fuisse ex agro delatum, ac vatem Lamponem, ut *cornu* validum conspexit & firmum media enatum fronte, duarum dixisse, quæ tunc in urbe erant factionum, Thucydidis & Periclis, potentiam ad unum delatum iri, apud quem hoc prodigium evenisset: Anaxagoram vero, quum os capitis dissecuisset, monstrasse, non compleffe cerebrum sedem suam, sed ovi modo acutum ex tota testa devolutum eò loci, unde originem radix *cornu* duceret. Atque in præsentia quidem habuerunt in admiratione, qui intererant, Anaxagoram: brevi post Lamponem, quum opibus fractis Thucydidis, resp. universam in Periclis manum recidisset.

recidisset. Poterat verò rectè uterque conje-
cisse, tam phycus, quàm vates, alter qui cau-
sam, alter qui exitum probè est assequutus:
illius erat enim munus, unde provenisset, &
quemadmodum esset enatum, contemplari:
hujus ad quid genitum esset, & quid porten-
deret, prænuntiare: in vita Periclis.

*Cornua & ossa fossilia copiosissima, SERE-
NISSIME PRINCEPS!* quæ ab aliquo tem-
pore ex agro TUO Wirtembergico effossa, in
conspectum prodire, simili modo, & majo-
ri quidem ratione, in admirationem rapue-
runt non tantum TE regionis Principem,
splendidis exornatum virtutibus, sed & aulæ
TVÆ clara lumina, quæ tot Christiani no-
minis Lampones, sagacissimos vates, tot Ana-
xagoras, perspicacissimos philosophos dixe-
rim. Imo ad quoscunque Naturæ mystes
mobilis fama prodigiosam, ut videbatur,
hanc rem retulit, criteria diversa produxit: al-
ter hoc, alter aliud vaticinans, quo cum suc-
cessu, meditationum collatio probabit &
eruditorum judiciofa decisio.

Periclem plurimum usum esse Anaxago-
ra, postquam melliflua Plutarchi penna me-
morasset

DEDICATIO.

morasset ibidem, eoque factum, ut maximum ei pondus & spiritus ad populum tractandum solidiores conciliarit, planeq; majestatem morum excitarit & extulerit: Nec vero, *subjungit*, hunc solum fructum tulit Pericli Anaxagoræ usus, verum omni etiam liberavit eum superstitione, quæ terrorem ex rebus æthereis imprimit ignorantibus earum causas, & iis, qui rerum divinarum metu pavent percellunturque rudes earum: quem eximens naturalis ratio, pro terrificâ & æstuante superstitione, securam inferit cum bona spe religionem.

Licet, SERENISSIME PRINCEPS! Pericli TE conjungere suadeat comparatio Stem-
matis ab antiquissimis temporibus illustris-
simi, similitudo virtutum verè heroicarum
& tanto Principe dignissimarum, potentia,
magnitudo mentis, clementia, justitia, & qui
vitæ humanæ veræ deliciae, & in regno com-
plementum felicitatis est, amor mutuus Prin-
cipem inter & populum existens, ab Illustris-
simis TUIS Majoribus jam Celebratissimus,
felicissime in SERENITATEM TUAM propa-
gatus: Licet inquam, multa conspirent in-
ter

DEDICATIO.

ter EBERHARDUM LUDOVICUM Wirtembergiæ, & PERICLEM Atheniensium Duces, tamen hoc maxime discrimen inter Eos intercedit, quod qui est insita vi ingenii ab omni superstitionis nævo alienissimus, palmam hac in parte præripiat necesse est, illi, cui in Ethnicismi caligine nato & educato, labore magno præceptoris, extirpanda erat ista præoccupatæ mentis eclipsis.

Nec est itaque cur Lamponis in modum, in examine *cornuum* & *ossium* fossilium Canstadiensium, cœlum terræ misceamus, & Principi perspicacissimo prodigia objiciamus, cum in promptu sint nobis, cum Anaxagora, non tantum rationes physicæ, sed etiam monumenta historica, quibus res abstrusa licet, explanari & à dubitationum tricis liberari potest. Si verò vel mihi Davo, qui cæstro vaticino haud sum percitus, Oedipi vices auguremque agere licet, de *Cornuum fossilium* Wirtembergensium copia, tanquam totidem Amalthææ *cornibus*, non nisi omnium rerum ad vitæ felicitatem pertinentium copiam, fortitudinem insuperabilem contra malitiosos almæ pacis osores, tot munimen-
ta pro

DEDICATIO.


ta pro tranquillitatis publicæ conservatione,
nova *cornua salutis*, tribus SERENISSIME
DOMUS Wirtembergicæ insigniorum Cor-
nibus, sub protectione magnanimi Principis
EBERHARDI LUDOVICI, novum robur
addentia, faxit DEUS, bono cum eventu,
augurari possum.

SERENISSIME PRINCEPS! scio quod
aula TVA Serenissima philosophorum opti-
mis sit stipata, qui Anaxagoræ vices agere, vel
si opus fuerit, TIBI Ariadnæum filum, ex Cor-
nifero & Ossifero TUO Labyrintho viam
monstrans, ducere poterunt: imo me non
fugit, sublime SERENITATIS TUÆ robur
ingenii adeo penetrans esse, ut vel ad exem-
plum magni regis Macedonum de Jove Cor-
nigero nati, innumeris clari triumphis, & cu-
jus juvenia viriles annos superavit, Gordio-
rum IPSE nodorum dissector esse possis. Sed
ista me non morantur, quò minus [ad id qui-
dem humanissime invitatus, à Magnifico
TVO Consiliario & Medico, DN. D. Sa-
lomone Reifelio] aliorum clarissimorum
Virorum conceptibus, meum quoque
symbolum addam. Ex quo, si clemen-
tissimus

DEDICATIO.

tissimus assensus SERENITATIS TUÆ,
[sub cuius auspiciis & gubernaculo dete-
ctum est curiosissimum hoc scribendi obje-
ctum,] sperari posset, esset omnino cur mihi
gratularer. SERENISSIMA igitur fronte, pro
agnita in studiorum cultores clementia,
meas hasce pagellas, quas præ pedibus TUIS
humillime nunc evolvere nitor, aspice, quip-
pe quæ si quidquam boni continebunt, tanto
Tutelari Deo jure merito sacræ esse debebunt.

DEUS T. O. M. qui TE columen gentis
TUÆ constituit, roboret invicta virtute
TUA consilia, TUOS conatus, ut instar Mo-
nocerotis alexipharmaca qualitate præditi,
continuo debellare possis, quidquid langui-
das reddere posset TIBI subditas regiones: ut
solidissimum SIS atq; foecundissimum Uni-
cornu salutis, quod sese pro ædificatione SE-
RENISSIMÆ DOMUS WIRTEMBERGICAE,
& pro consolatione populi TUI, in floridis
Nepotibus, ad numerum Unicornuum Can-
stadiensium fossilium, absque corruptionis
labe perennans & indelibatum videat. Sca-
phusiæ Helvetiorum, anno Salutis MDCCI.
die 26. Maji.



OEDIPUS OSTEOLITHOLOGICUS,

Seu

Dissertatio Historico-Physica

de

Cornibus & Ossibus fossilibus Cansta-
diensibus.

PROOEMIUM.



Causa hujus dissertationis est admiratio, quam ignorantiae filium qui dicunt, improprie loquuntur. Quidni admiranda Dei opera à sapientibus magis, quam ab imperitis admirarentur? Quæ enim quis ob rara phaenomena suspicit, ea investigat; quæ investigat, ea materiam præbent meditationis: quò magis autem quis meditatione mentem excolit, eò magis Opificis Omnipotentis bonitatem, rerum naturalium ubertatem, varietatem, affectiones, mutationes, & concinnam nihilominus harmoniam, admirari tenetur. Ex altera parte ignorantis est, si in rem haud quotidianam quoque fortuito impingat, eam per transennam saltem aspicere, imo vix ob cœcitatem mentis sensuum externorum censura dignam judicare. Admiratio inquam, in illis, quibus è meliori luto finxit præcordia Titan, non est effectus ignorantiae, sed affectus mentis sublimioris verè heroicus, ex operibus Opificem, ex creaturis Creatorem investigantis atque cognoscentis.

scientis. Præclare nobis hujus veritatis exemplum præbet, divino spiritu perflatus & regiis virtutibus instructissimus vates ille regius *David*, dum admiratione rerum divinarum humanarumq; percitus, pie & sapienter modulatur: *Quàm ampla sunt opera Tua, ô Jehova! quàm omnia sapienter fecisti! quàm plena est terra possessione Tua!* Psalm. CIV. v. 24. & iterum: *Jehova Domine noster! quàm magnificentum est nomen Tuum in universa terra; cui exponis supercælestem decorem Tuum!* Ps. VIII. v. 2. nec non: *Benedictus Deus Israël, qui facit mirabilia solus*, Ps. LXXII. v. 18. Siracides quoque Hebraicæ gentis legislator virtutum, admiratione Dei operum ductus, ita: *Dedit hominibus scientiam Altissimus, honorari in mirabilibus suis*, lib. Eccl. cap. XXXVIII. v. 6. Eandem regiam ingrediuntur viam, quicumque è tenaci ignorantia luto sese extricare, & almam veritatis faciem persequendo & amplectendo, ad astra volare conantur. Nam

Felix, qui poterit rerum cognoscere causas!

Hac in parte non satis deprædicare quoq; possum, Viri Illustris ac Generosi, *Dn. Petri Valkenierii*, Celsorum & Præpotentum Confoederati Belgii Ordinum p.t. ad Helvetorum & Rhætorum Respublicas Ablegati meritissimi, pro pacis publicæ conservatione licet semper occupatissimi & indefessi, haud vulgarem tamen in conquirendis rarioribus Naturæ cimeliis (non aurum gemmasque, sed fossilia naturaliter affabrè signata puto,) solertiam, undique sibi conquisitorum sagacissimam disquisitionem, & inde natam cognitionem exquisitam, qua instructus, de omnibus & singulis egregium fert judicium, ita tamen, ut pro more magnarum mentium, nec aliorum quoque floccipendat criteria, sed pro agnita generositate, meditatione digna censeat. Sic illustris hic Vir, in omni scibili versatissimus,

Proœmium.

mihi Davo licet, non Oedipo, quò Dissertationem hanc qualem cunque exararem, author extitit benignus, eidemque Oedipi nomen imponam, conceptuum assensu gratiofo præbuit occasionem: qua itaque, si quid emolumenti in orbem literatum redundabit, Ipsi tribuat curiosus lector, rogo. In humanissimam illustris Viri invitatoriam epistolam anni præteriti, pro singulari in immerentem gratia ad me exaratam, meam responsionem saltem opusculo præfigere visum est, quò natales harum meditationum, de abstrusis admodum Cornibus & Ossibus fossilibus Canstadiensibus, eò melius innotescant: Quæ sequentibus absolvebatur: *Illustre & Magnifique Seigneur! L'honneur de Vòtre lettre tout à fait engageante, tant par rapport à la grace particuliere, que Vòtre Excellence m'en temoigne si tendrement, qu'à l'égard de la communication de ces pieces curieuses de nouvelles decouvertes faites à Canstat, deja si renomées parmis les gens des belles lettres, me serviront d'aiguillon, à tacher, de ne jamais laisser échapper aucune favorable occasion, pour montrer en effect, combien je suis redevable à Vòtre Excellence. Et c'est ce même dessein, qui m'empêchât jusques icy, d'estre plus ponctuel, en donnant mon sentiment sur ces recherches. Car l'histoire du fait, & des circonstances d'une production semblable, si nécessaires pour devenir au bout des pensées, m'estant inconnues, il me sembloit, d'estre à propos, d'en attendre leclaircissement auparavant, d'une personne de foy, & d'un temoin oculaire, qui est Monsieur Reifel, premier Medecin de son A.S. le Duc de VVirtemberg; à qui j'ay écrit sur cette matiere. Lequel differant sa réponse, que j'attans, je me trouve contraint, de donner à Vostre Excellence, sur un sujet pas suffisamment eclairei, mon advis, peut estre pas mieux fondé. Mais pourtant, me confiant pour cette fois, à ce peu de circonstances, qui m'en sont connues, je soutiens avec Vòtre Excellence, que cette decouverte, n'est qu'un amas d'ossements, de toute sorte*

Proœmium.

sorte des bêtes, qui y sont esté enseveli depuis plusieurs siècles, dont une partie, par la réception d'un suc petrifiant dans leurs pores, a obtenu la consistance de pierre. Mais de croire, que ce fussent des reliques d'une défaite du temps des guerres, entre les anciens Romains & Allemands, c'est cette difficulté, qui m'en empêche, qu'il n'y en a plutôt des ossemens d'hommes, que de bêtes. Cette pensée m'a deduit à la considération de la coutume des anciens, de faire leurs sacrifices. Plutarque & Macrobe entre autres, nous en instruisent, que parmi les Payens, aussi bien Romains, qu'Egyptiens, il n'estoit pas rare, de faire ces sortes de sacrifices qu'ils appellent *Piacula*, (*non enim tantum Superis sed etiam Inferis sacrificabant*,) où leurs Prêtres egorgerent plusieurs sortes des bêtes dans une caverne, laquelle puis après ils renfermerent; pensant de rentrer ainsi en grace de Pluton, ou d'un autre Numen enraciné contre leurs pechés. La même idolatrie on peut soutenir des anciens Allemands & Suevois même, dequels Schedius de *DI Germania*, selon Tacite temoigne, qu'ils étoient entr'autres fermement attaché à la superstition de l'Isis des Egyptiens; laquelle étant adorée, comme Deesse de la Nature, l'abondance (*hubertas*) de laquelle fut marquée par quantité de mamelles au sein. Ce qui m'a donné aussi sujet, de soupçonner, avec la bonne grace de Votre Excellence, que peut estre nos ancestres ensorcellé de bigoterie, (car en nostre Suisse même, il y a encore des monumens des Temples d'Isis & de Mercure, à Vindonisse & à Vetingue,) ont presté ce même hommage à leur Patron & Patronne, laquelle à ce que prouve Kircher, (*Obelisc. Pamphil. l. 3. c. 7.*) n'est autre, que la Proserpine. Mais, Magnifique Seigneur! ce ne sont que des Chimeres, je l'avoue, s'il est vrai, ce qu'on me rapporte d'autre part de cette grotte d'ossemens; c'est à dire, qu'on y trouve encore des mâchoires & des dents d'une grandeur effroyable d'onze pieds de longueur. (qui dussent estre des bêtes sans exemples en ces quartiers,) jusqu'au moindre degres de mâchoires & des dents de souris; mais s'ils sont

Proœmium.

ou d'os, ou de pierre, on ne me dit rien. Que dirons nous la dessus, si la chose est comme cela? Pour moy, je suis contraint par nécessité, de suspendre mon jugement, jusqu'à ce, que j'auray le bonheur, ou de voir une description de toutes les circonstances, ou bien le lieu même, qui produit ces merveilles. Cependant, en souhaitant de tout mon cœur à V^{otre} Excellence & à toute V^{otre} illustre famille, une bien heureuse nouvelle année, & beaucoup suivantes du nouveau siècle, comblées de toute sorte de prospérité & succes en Vos illustres emplois, je demeure de V^{otre} Excellence, &c. Schaffhouse le 15^{me}. Janvier. 1701. Nec denique Viri venerandi ac Magnifici D. D. Salomonis Reifelii, Philosophi, Medici, Mathematici solertissimi, de mundo erudito ob præclaros animi foetus optime meriti, Consilarii, & Archicatri Ducalis Wirtembergici dignissimi, laudes reticere possum, quatenus postmodum ad petitionem meam, tam prompto animo, & qua est in literatos & emolumentum literarum animi propensione, præcipuarum circumstantiarum ad rem facientium relationem, lubentissime comunicavit; quam etiam ex authographo ejus, ad majorem dilucidationem adnectere, consultum esse duxi.

Relatio, de loco natali Cornuum & Ossium fossilium Canstadiensium, & specierum, quæ ibidem hucusq; sunt reperta.

CAnstadii, quod est oppidum Wirtembergicum, Stutgardia horæ unius spatio distans, ubi Romanorum stativorum multa supersunt monumenta & vestigia, in colliculi calcariis saxis obsiti olim, & adhuc repleti, mille gressibus ab oppido diffiti loco, muris sexangularibus, crassis octo pedes, longis fere octoginta pedes, quantum ex rudibus & angulis, obtuso uno, altero recto, licet conjicere, atque

Proæmium.

atque rupibus ambientibus, quibus murorum fundamēta, pedibus fere tribus adhuc alta, imposita sunt, concluso, magnifico, adeoque vel sancto, ad propugnaculum, aut templum forte condito, ab Aprilis fine, usque ad finem Octobris anni 1700. effossa sunt jussu Serenissimi Ducis Wirtembergici DN. EBERHARDI LUDOVICI, post inventa aliquot exemplaria, ex luto, plus quam sexaginta cornua, seu corniformia corpora, quæ alibi Unicornu seu ebur fossile dicuntur, à pede uno, usque pedes decem & amplius longa & incurvata: quibus immixta sunt innumera ossa, primo grandia, ut maxillæ, dentes molares maxillis infixi & singulares, scapulæ, coxendices, femora, craniorum scuta, vertebræ, & hæc omnia elephantis similia, nec non magnitudine æqualia: deinde mediocria, velut bestiarum domesticarum, sylvestrium, rapacium & ignotarum, nempe craniorum quoque partes, maxillæ, dentes molares, incisarii & canini, costæ, ossa anteriora & posteriora, vertebræ, scapulæ, tarsi ossa, pedum digiti, & ungularum atque unguium nuclei: porro parva, quasi minorum bestiarum, domesticarum æque ac sylvestrium: denique minima velut murium & glirium, eaque fere omnia, non figurata tantum, sed & organica ipsa, quoad conformationem externam & internam, quod ex collatione genuinorum apparebit, sed non amplius ossæa, si dentes plures saxeos excipias, margâ tectos & repletos, verum partim quasi calcinata, partim petrescere incipientia, illaque ut plurimum fracta & distracta, neque sibi coherentia; inter quæ tamen nulla humanis possunt comparari, nisi pro giganteis grandia illa aliquot sumantur. Adsunt verò & informia quædam, ut globi seu massæ ex marga aut bolo, silices marga tecti, lapides quidam digitati, frustra multa magna primo intuitu informia apparentia,

Proœmium.

ria, corticem tamen, laminas & spongiosos tubulos atque canales organicorum ostendentia. Inventa quoque sunt intra rupes pulvere pyrio ruptas, ossa organica petrefacta & fusca, rupibus includentibus colore similia: cochleæ etiam parvæ in saxeo illo, ex luto, arena, sale, silicibus & martiali minera concreto, ut in luto ipso: margæ etiam grana & striæ seu radii, & tabellulæ, quasi semina, ex quibus reliqua informia, forte & cornua concreverunt. Hic denique notandum, ubi ad viginti pedes effossa esset terra seu lutum, stratum illud cornuum & ossium cessavit, hinc sola terra sine ossibus reperta, deinde inferius rufa & lutea terra mixta lapideis & martialibus particulis, qualis circa Salsulam balneis salutaribus celebratam & transluentem Canstadiensem, coagulata reperitur. De his fossilibus Canstadiensibus, an sint mere mineralia & Naturæ lusus aut artificium, an animalium partibus mixta, rogatur prudentiorum judicium, quale expectat ab Exc.

V^{ra}. Cultor obligatissimus Salomo Reifel. D.

Stutgardia 10. Febr. 1701.



OEDIPI OSTEOLITHOLOGICI

Pars Prior, quæ est Historica.

§. I.



I ad petitionem Virorum clarissimorum humanissimam, prompto responsionis officio minus feliciter sum defunctus, veniam, ut spero, mihi conciliabunt, tum aliquot hucusque objecti impedimentorum obices, tum ipsius argumenti dignitas, & abyssus fere inaccessæ indaginis. Quò magis enim relationem de fossilibus *Canstadiensibus* mihi gratissimam, mente revolve, quò magis ipsa specimina, quæ hucusque videre mihi datum, oculorum aciei subijcio, eò magis revera menti meæ dubitationum, controversiarum ac difficultatum impedimenta se offerunt. Ita ut pene mihi videatur, sapientissimum rerum Conditorem & Gubernatorem, nonnunquam ambitiosis hominum mentibus, ejusmodi rerum naturalium Chimæras objicere, ad reprimendam quorundam nasutulorum arrogantiam, qui se jam totum Naturæ plagum exhaustisse, non tantum sibi, sed etiam aliis persuadere conantur. Multo consultius itaque in rebus hujusmodi abstrusis, dubitationes movemus, & ad τὸ ἐπ' ἐχελ, suspendendo judicium, recurrimus, donec meliora occurrant, quàm cæco præjudiciorum ductu, leviter conceptas opiniones, tanquam indubitatas, & ultrò amplectimur, & pro numerata pecunia aliis obtrudimus. Sic dum conjectura mea, de modo existendi horum ossium fossilium, à Viris doctis examinatur, quam ex nutu Illustris Viri, Domini *Valkenierii*, communis literatorum Mecaenatis, consignavi literis, optimo instituto dubium mihi movetur, de loco, *Plutarchi*, quem citavi, ubi Piaculorum & Supplicationum ritus

secundum Gentiles, huc trahendi, explicentur. Consulatur itaque hujus authoris liber de Iside & Osiride, ubi is inter cætera sic: *Magno autem aestu incidente, ac molesto, qui ultra modum adducat vel pestilentes morbos, vel alias inusitatas calamitates: sacerdotes quædam eorum, quæ coluntur animalium, abducentes tacite in tenebras, terrent primum ea minis: sin malum duret, immolant atque mactant: tanquam supplicium aliquod genii hoc si esset, aut alias expiatio magni mali magna, &c.* De Aruspiciis etiam & Hostiis injugibus & eximiis nuncupatis, quædam huc trahi possunt, ex *Macrobii Saturnaliorum libris* passim, & in specie è lib. III. c. V.

§. II.

Sed sic forte allegata, tanquam generaliora, rem acu, quod dicunt, minus tangere videbuntur, plura im promptu sunt, eaque specialiora exempla: quæ tamen nobis reservabimus, donec alteri dubio clavi Viri, de equorum immolatione, (quorum plura ossa è caverna *Canstadiensis* videri videntur,) sit satisfactum. Revera itaque non tantum extant authorum probatorum testimonia, de tumultis equorum, qui erga dominos dum viverent, benefici extiterunt, ut videre est apud *Plinium* lib. VIII. c. 41. & seq. sed etiam has bestias in sacris publicis immolatas esse à Romanis, fidem facit idem lib. XXVIII. c. 9. p. 511. lit. 48. Idem Romani in equestribus ludis equum immolabant Marti, teste *Plutarcho*, quæst. Roman. XCVII. Item exemplum equæ pro virgine immolatae, habet idem *Plutarch.* in vita Pelopidæ, tom. I. pag. m. 463. lit. a.

§. III.

At multò majora adhuc, confiteor, disquirenda sunt. Adest ossium diffusa multitudo, adsunt diversissima diversorum animalium, maximorum, minimorum, ossa dentesque. Sed hisce quoque difficultatibus obviam ire possumus, si ritus veterum tum Romanorum, tum Germanorum sacrificandi adcuratius consideramus. C. Marius enim illustre nobis exemplum præbet, imperator Romanorum contra Helveticas & Germanicas gentes famosus; is enim in nostris oris cum Cimbris præliaturus, diis vovit immola-

immolaturum se centum boves : Catulus socius ejus Fortunæ ejusdem diei ædem, vid. *Plutarch.* in vita C. Marii, p. m. 166. lit. d. Qui imperatores, cùm eo tempore victoriâ sint potiti, quis negabit, illos forte his ipsis in regionibus, ubi tunc secunda fortuna præliabantur, pro religione gentis stetisse votis? Quid quod dicam, de diversitate victimarum, quas præter modo dictam Hecatomben, ab *ἐκατόν*, centum & ἑξῆς, bos, secundum quosdam, diverso instituto litabant diis, veteres gentiles tam Germani, quàm Romani : homines nempe pro piaculo Romani immolarunt, comprobante id *Plutarcho*, Quæst. Roman. XXCIII. Et de Germanis sic habet *Cornelius Tacitus* : Deorum maximè Mercurium colunt, cui certis diebus, humanis quoq; hostiis litare fas habent : Herculem & Martem concessis animalibus placant : pars Suevorum & Isidi sacrificat, de moribus German. §. 4. ut plenius id & specialius comprobat *Elias Schedius*, de DIis Germanis, Syngramm. II c. 31. Inter bestias vero piaculorum, &c. loco sacrificatas, maxime memorantur, canes, capræ, fues prægnantes, vaccæ prægnantes, & quæ non animantia? à citatis *Plutarcho*, *Macrobio*, *Plinio*, *Gesnero*, &c. passim. Imo nec ipsos mures à victimarum censu exemptos fuisse apud idololatrias, fidem facit cit. *Schedius*, Syngramm. I. c. 4 pag. 92. Et *Ælianus*, de animalibus id tradit, ut refert *Gesnerus*, in descriptione muris, mures adorari ab his, qui *Troadis Hamaxitum* incolunt. Tum verò apud eos *sminthes* (mures) *cicures* alunt, eûq; victus publice præbetur, atque infra altare, ubi degunt, latebras habent. Hecatomben autem quod attinet, notandum est, quod licet secundum institutum, proprie centum bobus aliàs institueretur, tamen postmodum bestiis minoris pretii diversis quoque, in rerum necessitate celebrata sit. Vid. *Grand Dictionnaire Historique* par M. *Louys Morery*.

§. IV.

Sed, unde quæso! non dicam molossæos, sed colossæos illos dentes, maxillas, ossa, aut si mavis cornua fossilia, copiosa, maxima, quorum caverna *Canstadiensis* promptuarium est, arcessimus? In hac re, mehercle, si unquam alibi, hæret aqua. Si pro anima-

lium ossibus hæc sunt habenda, certè inquilinorum esse non posse cuncta, videtur. Itane ex ipsa India vel Africa feris & belluis, nobis haud quotidianis, frequentibus, deducenda erunt? Quid multis? Elephantorum esse (Venerandi *Reiseli* verba sunt,) figura & magnitudo, & conformatio ipsa interna & externa, urgent credere. Verum fides historica mihi deficit, qua aperte probare possem, elephantos unquam esse immolatos, nisi meam faciam *Plutarchi* auctoritatem, de illis quaternis, à Ptolomæo Philopatore mactatis, quo numini gratias persolveret pro victoria. Quid vero, si velimus suspicari, quod forte Romani, pro astutia eorum, tanquam Africae Indiaeque terror, & partim domini facti, ex hisce regionibus devictis accepta hujusmodi incognita tunc in his oris monstra, contra Germanos alias insuperabiles, in prælia conduxerint, & quos bello & armorum virtute superare non poterant, belluis hisce maximæ molis & inusitatae formæ, terrerent atque fugarent. Majores enim nostri armis inhiantes, seriusque literarum notitia imbuti, hostibus Romanis relinquare sunt coacti, quidquid vellent, de Germanorum virtute bellica vel recensere, vel reticere. An autem Romani tantam vastitatem (ut cum Plinio loquar,) suis expiationibus (de quibus postmodum specialius,) intermiscuerint, an verò ipsi Germani superatis hostibus, diis suis hujusmodi belluas cum aliis animalibus voverint, anceps in medio relinquo. Morem tamen hunc exprimit *J. Caesar* lib. VI. Comm. bell. Gall. *Celtæ*, inquit, *Marti*, cum prælio dimicare constituerint, quæ superaverint animalia capta immolant, reliquasq; res in unum locum conferunt: multis in civitatibus harum rerum exstructos cumulos locis consecratis licet conspiciari; conferatur cit. *Schedius*, *Syngramm* II. cap. 34.

§. V.

Et si heic obijciatur multitudo corniformium corporum, quorum sex mensium spatio plus quam sexaginta majora, minora, sunt effossa, & quæ à quibusdam pro dentibus elephantorum habentur: tantum enim elephantum numerum in uno loco vix unquam vidisse Europam, si singulis saltem bina dicantur. Sed
hisce

hisce respondere possumus, quod, uti historicorum incuria, vel partium studio, (cujus ipse *Cæsar* insimulatur à Maximiliano Imp. apud *Aventin* l. II. Annal. Boj.) multa latere possint notatu dignissima; ita etiam fastui Romanorum nihil non conari & exequi, integrum fuerit. Certè, quod Romani in bellis contra Germaniæ gentes elephantibus sint usi, fidem facit *Plinius*, dum l. VII. c. III. de docilitate eorum, sic perhibet: *Mutianus* ter consul, autor est, aliquem ex his & literarum ductus Græcorum didicisse, solitumq; perscribere ejus linguæ verbis: Ipe ego hæc scripsi, & spolia Celtica dicavi. De eorum verò multitudine, qua potiti sunt Romani, eo-que in contemptum decelsere, idem: *Roma* plurimos, anno quingentesimo secundo, victoria *L. Metelli* pontificis in *Sicilia* de *Pœnis* captos vidit. Centum quadraginta duo fuere transvecti ratibus, quos doliorum consertis ordinibus imposuerunt. *Verrius*, eos pugnasse in circo, interfectosq; jaculis tradit penuria consilii: quoniam neque ali placuisset, neque donari regibus. *L. Piso*, inductos duntaxat in circum, atque ut contemptus eorum increfceret, ab operariis hastas præpilatas habentibus, per circum totum actos. Ne quid deinde iis factum sit, autores explicant, qui non putant interfectos: lib. cit. C. VI. *Pompei* quoque altero consulatu, dedicatione templi *Veneris* victricis, pugnare in circo XX. aut ut quidam tradunt, XVII. lib. cit. C. VII. Pugnare & *Cæsari* dictatori, tertio consulatu ejus, XX. contra pedites quingentos: iterum totidem turriti, cum sexagenis propugnatoribus, eodem quo priores numero peditum, & pari equitum è diverso dimicante, &c. c. l.

S. VI.

Aliam quoque heic controversiam, de vario modo sacrificandi & immolandi animalia, prævideo dirimendam; quæ nisi removeatur, conjecturæ meæ multum ponderis decessurum fore cognosco. Gentiles Superos & Inferos deos coluisse, iisque distinctim immolasse bestias, aras & altaria constituisse, ex monumentis veterum passim innotescit, quod annui quoque in epistola ad Illustrem Dominum *Valkenier*. vid. Proœmium. Hanc veritatem loquitur inscriptio vetus Romana ex *Kirchmanno* notata à *Sert. Ursato*, Monumentor. Patavin. lib. I. sect II pag 90.

CORNELIA. ANNIA. NE. INDESO
 LATA. ORBITATE. SUPERVIVE
 RET. MISERA. VIVAM. ME. VLTRO
 IN. HANC. ARAM. CVM. VIRO. CVM.
 QVO. VIXI. ANN. XX. SINE. VL
 LO. DO. LIB. LIBERTABVSQVE
 NO. VT. QVOTAN. SUPER. ARAM
 NO. PLVTONI. ET. VXORI PRO
 SERPINÆ. OMNIBVSQVE. SACRI
 FICENT. ROSISQVE. EXOR-
 NENT. DE. RELIQVO. IBI. EPV
 LENTVR.

Terræ itaque eos consignasse piacula inferis dicata ; superis ut plurimum flammis litasse, verosimile est, quò suum cuique traderent numini. Sciendum itaque, sermonem hoc loco non esse de holocaustis, ex ὅλῳ, totus, & καυσὼν, combustum, quod genus est sacrificii, in quo tota hostia cremabatur. Id enim si intelligeretur, ossa tam bene conformata, à tot seculis superesse non potuissent: Quem ritum quoq; in veteris Testamenti libris si comprobatum videmus, incidenter notandum, hunc eundem, tanquam mysticum Christi typum, postmodum à diabolo, divinorū operum simia, occæcatis gentilium mentibus, sub specie veræ religionis, maledicta tamen intentione, idololatriam per mundum propagandi, instinctum esse. Contrario autem modo se res habuit, circa eorundem Ethnicorum vota, piacula, lustrationes, supplicationes, in quibus exta tantum seu viscera exurebantur, postquam aruspiciis simul inservivissent. Eadem ratione supra. §. III. citatum C. Marium, instante prælio cum Cimbris, sacrificantem ajunt, quum exta ei porrecta essent, exclamasse: *Mea est victoria!* referente Plutarcho, in vita ejus. Clarior est locus, quo de Pyrrho refertur ab eodem: quod lienosis existimabatur epitulari, quum gallum gallinaceum album immolans, supinis jacentibus, lienem pede dextro premeret leniter; & dum subjungit idem: *Peraçto sacrificio, gallum accipiebat, eratque hoc præmii ei gratissimum; in vita ejus: inde liquet, eum gallum hunc non potuisse præmii loco accipere, si inter immolandum fuisset exustus.*

exustus. Sic Plutoni exta tantum exposita flammis esse in sacrificio, *Maro* l. VI. *Æneid.* tradit :

Tum Stygio Regi nocturnas inchoat aras :

Et solida imponit taurorum viscera flammis,

Pingue superq³ oleum fundens fumantibus extis.

§. VII.

Tempus nunc est, candide lector ! ut propius ad confinia *Canstadiensia* accedamus, ut sic eò feliciter instituti nostri terminum attingere possimus. De Numa Pompilio *Plutarchus* refert, quod hunc memorent, primum *Termini* templa excitavisse, unde *Terminalia* festa ortum duxere : sed subjungit idem : *Termino* publicè & privatim in finibus agrorum immolant hoc tempore animalia, olim hostia erat inanimata : docente Numa, debere eos deum *Terminalem*, quum pacis sit præses & arbiter justitiæ, cæde purum esse, in vita ejus. *Rhenus* & *Danubius* communi scriptorum fide dignorum suffragio, termini fuerunt, ultra quos vix quidquam trophæo dignum arrogantia Romanorum contra indomitas Germaniæ gentes præstitit ; imo hos amnes, Germanicarum in Gallicum solum, (quo tunc Romani potiebantur,) incursionum crebriorum obices habuisse Romanos, clare deducit sæpe jam citatus *Schedius*, *Syngamm* I. c. I. Nonne *Canstadium* itaque, quod inter utriusque fluminis fontes & incubula quasi intermedium est, repagulum esse potuit & propugnaculum Romanorum contra Germanorum invasiones ? & ita simul ibidem celebrari potuisse *Terminalia*, à verò non admodum abludit. Sed magis adhuc arridet locus, quem suppeditat inquilinarum rerum scriptor haud obscurus, *Aventinus*, dum de *Rheno* & *Danubio* ita : Hi amnes, inquit, cum aucti aquis erant, ab omnibus, qui oram *Galliæ*, *Rhetiarum*, *Vindelicorum*, &c. incolebant, *Dis* honos habitus, gratiæq³ actæ : quod si defecissent, aut siccitate decrevissent, aut denique glacies ripas conjunxisset, omnis tunc æas atque sexus, viri, mulierculæ, senes, pueri, puellæ, publice & privatim indixere justiciam : ab auguribus, sacerdotibus, sacrificulis feriæ conceptæ, supplicationes decretæ, circa omnia pulvinaria deorum supplicatum est : hostiæ majores, minoresq³ mactatæ, & peculiaribus ceremoniis, sacris solemnibus, votis & comprecationibus, *Jovi*

Elicio operati sunt Pontifices minores, & Flamines maximi, ut impetrarent pluviam inundationemq³ horum fluminum, ne Germanis pateret transitus: *Annalium Bojorum, lib. II. pag. 63.*

S. VIII.

Nonne quoque *Canstadii* nomen ipsum antiquitatem redollet? ut taceam, quæ etiamnum (venerandi *Reiseli* innitor auctoritate,) ibidem Romanorum stativorum multa supersunt monumenta & vestigia, & quam modo circumferunt ejusdem districtus novam Laconici sumtuosissimi detectionem. Nonne inquam, *Canstadium* antiquitus potuit esse, vel Cattorum statio, vel Catuli statio, imo forsan Canum statio? de quo *Annales domesticæ* loqui deberent. *Catulum* in bello contra Cimbro, *Marii* socium fuisse, jam supra S. III. dictum est. Vel ex vocis allusione subolfacere possemus, Romanos ibidem habere potuisse canum venaticorum custodiam, imo fortè Dianæ ædem: & ita Cynopolim Ægypti, vel civitatem illam, quam honori defuncti canis constituisse Magnum Alexandrum, *Theopompus* scribit, imitari potuit. Si hodie adhuc, vix ullibi Germanicarum regionum, districtus venationi aptior Ducatu Wirtembergico reperitur, tam quoad sylvarum constitutionem, quàm quoad ferarum ad principum mensas expetitarum ubertatem: non minus id dicendum erit cæteris paribus, de antiquis illis temporibus, dum Germania adhuc, *Tacito* teste, erat horrida sylva. Alludit *Claudianus* ad Styliconem, Panegyri primæ, his versibus:

Ut procul Herciniæ per vasta silentia sylvæ
Venari tuto liceat, lucosque vetusta
Religione truces, & robora numinis instar
Barbarici nostræ feriant impune bipennes.

Cur reliquis Dianæ fanis soliti fuerint Romani, cervorum cornua affigere, ei quod in Aventino erat, boum cornua affixissent? diligit *Plutarchus*, Quæst. Rom. IV. Itaque vetustioris etiam indaginis esse possent Serenissimæ Domûs Wirtembergicæ tria insigniorum cornua cervina, quàm vulgò creditur. Quod ad nemorum potentem dominam, eandem hanc esse cum Hecate, *Iside,*

Iside, vel Proserpina, cui canes immolabant, præter *Kircherum*, *Obelisc. Pamph. lib. III. cap. VII. Gesnerus* comprobat, de cane, pag. m. 230. & *Louys Morery* de Hecate refert, quod antiquitas fabulosa ipsi tria nomina imposuerit; erat enim Luna cœlestis, Diana terrestris, & Proserpina infernalis, *Grand Dictionaire hist.* Caninorum ossium non deficit copia in Canstadiensi Hecatombe. Triceps dicitur *Ovidio* Hecate, quia tria habuit capita, dextrum equinum, sinistrum caninum, medium suis agrestis. Catulos Hecatæ pro cæna offerebant. Scribit *Sophron* & item *Lycophron*, à Diaria canes jugulari: quin & speluncam fuisse Hecates in Zeranthon. Zeranthon est antrum Canivoræ deæ. Porro ait etiam *Phurnutus*, canes ideo Triviæ sacros, quod illi jugulari soleant. Canes à Caribus, &c. Marti immolari, *Apollodorus* & alii scripserunt. Rubigo deo, vel Robigini deæ, ad arcendam ex segetibus robiginem, veteres mense Aprili extis canis & ovis sacrificabant, ut *Ovidius* in Fastis testatur: vid. *Gesner. c. I*

§. IX.

Non est denique, quod existimemus, tot seculorum decursum, & tempus edax rerum, ossa hæc sustinere haud potuisse incontaminata. Salinum enim ossium principium, quod balsami loco est, cum terrestribus particulis combinatum, ea perennia reddere, & ratio & experientia loquuntur: imo eadem à consortio terræ non uliginosæ, sed mineralis, ut est Canstadiensis, in lapideam rigere consistentiam, non est quod multis probem. Sic ossa Romanæ historiæ principis T. Livii, (si fides habenda inscriptioni sarcophagi, in quo fortè reperta,) qui libros suos anno post Christum natum decimo scripsit, & quarto imperii Tiberii Cæsaris anno, vita excessit, etiamnum incorrupta Patavii visenda existunt. Quid quod dicam de fano quodam Tolosæ? in quo, referente *Thoma Bartholino*, *histor. anatom. cent. I. 62. crypta est, in qua humati, per 600. amplius annos, illæsi supersunt, cum pilis & cute candida, ut nepotes avos suos longa serie dignoscere possint.* Imo Tulliolæ, Ciceronis filiae corpus, regnante Sixto IV. Pontifice, Romæ in via Appia, per 1700 annos incorruptum est inventum, teste *Cæl. Rodigin. L. III. Ant. lect. c. 23.*

Hæc sunt itaque, candide lector! monumenta illa historica, ex quorum consideratione mentem subiit, detectam hanc ossium copiam, reliquias esse sacrificiorum supplicium, ab Ethnicismi temporibus hucusque superstites. Quibus tamen, quia nec dum omnibus & singulis satisfactum esse difficultatibus est visum, neque mihi, nec forte aliis, quæcunque ingenium torquent dubia, sunt sublata, physica quoque subjungere quædam subsidia, operæ pretium esse duxi, quorum beneficio, tanquam almæ veritatis lapide Lydio, hucusque prolata adcuratius examinentur, neque *Orveni* monostichon objiciatur:

Omnis nostra fides pendet ab historia.

OEDIPI OSTEOLITHOLOGICI

Pars Posterior, quæ est Physica.

S. I.

IN productione rerum, quæ præter vulgo notum Naturæ processum, ex uno regno in aliud, aliquem transgressum faciunt, dum videlicet, animalia vegetabilium vel mineralium, vel mineralia animalium aut vegetabilium, vel denique vegetabilia, mineralium aut animalium dant vestigia imo & specimina, (ut revera est productorum triplicis regni harmonica quædam confœderatio & cognatio, non tantum quoad communia principia sed etiam quoad eorum ipsam configurationem,) ritè considerandum est, num ejusmodi Naturæ producta vel suapte sponte hanc vel illam figuram affectent & semper; an verò casu aliquo suam consistentiam & conformationem reliquerint, aliamque affectarint. Regulæ itaque hujusmodi sunt proponendæ, quarum ope, ad suam classem quævis possimus revocare. Exempli gratia, cum natura, Agricola teste, de natura fossilium, lib. VII. lapides arborum similes procreet, diligenter videndum est, an corticem & medullam aliaque habeant. Quæ si absunt, non stipites in lapides conversi sunt, sed natura fecit lapides, stipitum simillimos. Sic etiam lapides, secundum Licetum, si non tantum externa lineamenta,

menta, sed etiam figuram intestinorum exprimunt, animalia secundum se tota in lapides conversa sunt, & præcipue in lapides salsos: vid. ejus lib. de Anulis antiquorum Cap. V. & quos citat. Albert. Magnus & Avicennas.

§. II.

Atqui de ossibus fossilibus *Canstadiensibus* ita comparatum est, ut nec minima notula partium externarum internarumve desiderari queat. Adfunt quippe cavitates fistulosæ; adest eorum consistentia porosa & partim spongiosa; nec desunt apophyses, epiphyses, symphyces, capita, acetabula, eaque cartilagineæ lævitatibus. Nonne in maxillis conveniens laxitas interna, consistentia naturalis externa, alveolorum legitimæ contignationes? In dentibus verò nervulorum patens via, soliditas consueta, lævor, eorundemque conspicuæ radices? Imo prætereundum non est, quod inter illos reperiantur molossæi quidam, versus apices à masticatione admodum detriti & deplanati. Quid itaque hinc est inferendum? nisi quod sint revera, cæteris paribus, animalium ossa plus minus petrificata. Possemus quidem & inde argumentum desumere, quod hæc ossa artificio chymico tentata, sal volatile sustinuerint, ut Vir Clar. & Excell. Dn. Joh. Jacobus Mejerus nostras, Medicus absolutissimus, amicus integerrimus mihi retulit: quod tamen in mineralibus & lapidibus non adeò est obvium: nisi & sal volatile coralliis ac ipsis Conchis fossilibus adcuratioribus inesset, experimentis D. Herm. Nic. *Grimmii*, in Anatom. Coralloid. in Ephem. N. C. Dec. II. Ann. I. Observ. CLXXIII. & D. Joh. Dan. Gejeri, de montibus Conchiferis Alzejenfibus §. 16. pag. 17. licet id ut plurimum ob insignem volatilitatem avolet.

§. III.

Negari quidem vix potest, quin tellus omnium rerum creaturarum semina & principia in se contineat, tam earum, quæ ex ipsa nascuntur proprie & immediatè, quàm illarum, quæ vel volitantium constituunt nubes, vel quadrupedum greges, vel nutantium turmas: *ῥωα* inquam, *φύτα* & *ζωοφύτα*, telluri, almæ rerum matri vel propterea dictæ, sua debent incunabula principiorum.

Num verò & eadem animalium existere possit uterus, in quo non tantum generari, sed etiam vitalitatem adipisci, & ad justam quantitatis dimensionem pervenire queant, hoc operæ pretium est, disquirere. Revera quidem polydædala tellus est, vel ut clarius loquar, versutissimum est per recessus ejus disseminatum Naturæ principium activum, in concinnandis & continuandis rerum formis, & ubicunque summam perfectionem intendit: qua nisi potiat, non hoc sui fit culpa, sed materiæ, in quam agit, inobedientiæ, seu principii passivi ineptæ dispositioni, id est attribuendum.

§. IV.

Ut abstrahamus hac vice, ab animalibus & vegetabilibus proprie dictis, observantur inter fossilia seu mineralia, præter ruderosas & casuales figuras, elegantissimæ icones, summam activitatem principii nitrosi multiformis, quod voco, demonstrantes, dum id in ipsis lapidibus vim suam exerere non desinit. Sed istæ figuræ perfectionis gradu inter se sunt distinctæ: vel enim 1. *picte* sunt tantum, ut videmus in Achate, Dendrite, &c. vel 2. *sculptæ* quoque, ut passim extant multæ, striis nempe & incisuris elegantioribus conspicuæ: vel denique 3. *celatæ* seu elevatæ, in longum, latum & profundum extensæ. Hujus itaque tertiæ classis corpora, vel ostracodermata seu testacea, vel plantas, vel animalia eorundemve partes referentia, aut erunt petrificata, aut per se à plastica principii activi virtute elaborata. De priorum, nempe petrificatorum existentia, non est quod dubitemus, cujusmodi & ego unum ac alterum specimen cum signis antea §. I. Partis poster. propositis, penitus conspirantibus, in scriniolis meis asservo. Posteriora verò demonstrari videntur, à natali solo adæquato, quod sunt montium quorundam juga, vel certi districtus, à multitudine, continuo sublatis non cedente vel deficiente; à matricibus è quibus suo tempore excluduntur; à quorundam figura propria, & cui nulla cum ullo vegetabili aut animali, aut animalium testis seu partibus, intercedit similitudo aut formæ aut magnitudinis; ut sunt: belemnites, cornua Ammonis, lapis Isidis multimammus, improprie ovum anguinum aut echinites dictus, ombria, brontia; à Conchite ex mero fabulo compacto, cujusmodi quid monstrare possum, &c.

§. V. Nec

§. V.

Nec istis contenti nonnulli haud infimæ notæ Medici & Philosophi, ulterius adhuc progrediuntur, statuentes, (ut antea me pervestigaturum esse promisi,) quod in ipso terræ & lapidum durissimorum meditullio, animalia quædam generentur: consulantur in hanc rem, *Agricola* de animalib. subterr. *Matthiolus* in præf. 5. *Dioscorid.* *Theobald.* *Arcan. nat. VVorm.* in Museo, alii. Imo observatum esse, *Gaffarellus* in suis curiositat. inaudit. aliquot exemplis probat, lapides istos, & alia, quibus serpentes, scorpii, bufones, &c. figurantur, si in loco esse contigerit, quo propter materiæ habilitatem talia generari possunt, in similia, non alius generis insecta mutari, *Parte II. §. 6. pag. m 93.* Quæ testimonia eò minus quidem sunt rejicienda, quia & ipsi regioni aëreæ à viris fide dignis pediculorum, vermiculorum, ranarum, murium, piscium, &c. pluviatim deciduorum genesis, rationibus non minus, quam exemplis haud rejiciendis, conceditur: vid. *Kircherus* de Peste, *Terzagus* Musei Septaliani Cap. XVIII. pag. 45. *Cysatus* in descript. Lacus Lucernens. Cap. XX. M. *Georg. Michael*, in Notis ad *Gaffarell.* & qui apud eosdem citantur, *Plinius*, *Olaus Magnus*, *Olaus VVormius*, &c. Nec rejicio testimonium eorum, qui de mola minerali seu carne fossili, aliis Sarcite, mirandas recensent historias, utpote *Zach. Theobaldi* in *Arcan. Natur.* *Andreæ Libavii* Sing. *Parte I.* *Thomæ Bartholini*, de luce animal. lib. III. Cap. 7. Sic dum Bernæ Helvetiorum & in ejus districtu anno 1628. pestifera lues grassaretur, ibidem & in Argovia passim, carnis recentis magna frustra à porcis è terra sunt eruta, cujusmodi & in hortis dum areolæ effoderentur est reperta; & venerandus Parens meus p. m. suis oculis vidit fumo arefactam partem, beato nunc avo meo postmodum missam: quæ verò à bestiis vi adactis degustata, ut ejus temporis habet relatio, iis mortem accivit. Omnia ista, & plura ejusdem farinae, licet probatæ veritatis exempla, nulla tamen necessitatis lege evincere possunt conceptam opinionem, de fossilibus *Canstadii* ossibus, quatenus à me vera animalium reliquiæ pronunciantur.

Primo enim magnum discrimen est, inter animalium perfectiorum generationem; licet enim omnia viventia maxima, minima, salubria, venenata, ex ovulo producantur, tamen magis spontaneus est horum imperfectiorum, quàm perfectiorum, minorum, quàm majorum ortus: ut ita non tantum multò citius à leviori fermento excitentur & excludantur, quam majora & perfectiora, sed etiam non adeò adstricta sint ad determinatum locum, quin facile in actum deduci & vitalitatem adipisci queant, modo in superficie terræ, modo infra eandem, modo in aquis, & liquoribus aliis, imo nonnunquam in ipsa atmosfæræ regione, si saltem adsit legitima principii ignei seu fermenti vitalis nitrosi activitas, principii passivi aquei combinatio, & terrestris obsequium. Ita ut hac in parte non possimus non de insectorum insuperabili fecunditate idem, quod poëtarum princeps quondam de segetum abundanti noxa, conqueri:

Infelix lolium, steriles dominantur avenæ.

Non tantum itaque ex vivo oritur vivum, sed ex inanimatis prodire possunt animalia indeterminatè. Ut de pluribus, & propriis quidem haud paucis experimentis circa productionem animalculorum specie distinctorum ex diversis vegetabilibus, hac vice tacam, quæ ab aliquot jam annis feci, & quorum descriptionem commodiori reservabo occasione, sufficiat nobis copiosissima & admodum præcox murium generatio, quæ in navibus licet modo instructis, præcipue sal vehentibus, cum admiratione animadvertitur, & cujus rei veritatem, præter alios, *Fonsthorus* in *Taumatograph. Class. IV. cap. 4.* demonstrat. Quæcunque itaque ipsa quoque terra, præter vegetabilia & mineralia, exuperante naturæ fecunditate seu per superfoetationem immediate producere potest, erunt vel informes moles, ut de mola minerali seu carne fossili jam dictum est, vel ejusmodi animalcula, quæ licet suis membris, vasis, musculis, tendinibus, &c. quoque sint instructissima, tamen ad sui productionem, potius putrescente, quàm figente ac perficiente indigent fermentatione, & ita indeterminato loco & tempore, nisi principii passivi obsit tenacitas, ipsam vitalitatem adipiscuntur; quæ

quæ tamen, uti citò fit, ita etiam citò perit, quod præsertim in Ephemericis animalculis palam esse potest, de quibus consulatur D. Jo. de Mey, in append. Metamorphoseos insector. Jo. Gædardi: sin autem idem principium passivum minus adhuc fuerit aptum, saltem horum animalculorum exhibentur imagunculæ cœlato quasi principii nitrosi opere conspicuæ. Sed de animalibus majoribus, perfectioribus, quadrupedibus, jumentis, &c. vix unquam demonstrabitur, quod alio modo, alio loco, breviori quæ tempore, quàm per congressum masculi & femellæ, in utero adæquato & proprie dicto, concipiantur, & constituto, pro diversitate specierum tempore, excludantur.

§. VII.

Secundò, si objiciatur, ossa *Canstadiensia* fossilia, non pro verarum bestiarum sub ipsa tellure genitarum ossibus, sed pro lusu Naturæ haberi posse, quatenus eadem undique summam perfectionem rerum quidem intendens, deficiente tamen loco adæquato & materia sufficiente, facit quod potest: ut ita quoque hîc, loco animalium vi sua plastica animalium ossa fingere potuerit. Iis autem respondendum est, multò aliam rationem esse illius fossilis, quod osteolithos vocatur, quasi os lapideum osseum dixissem, quàm est ossium fossilium *Canstadiensium*. Osteolithos enim seu osteocolla, eneostis, &c. nihil cum ossibus habent commune, præter externam aliqualem figuram: substantia ipsis vel lapidea, vel gypsea, vel cretacea deprehenditur, neque verorum ossium habebunt internam configurationem, sed ponderosiora, densiora sunt & solidiora corpora. Multò inquam, aliter comparatum est, cum ossibus fossilibus *Canstadiensibus*; præter enim exactam diversorum animalium figuram externam ossium, exacte porosa, spongiosa, vel tubulosa quoque sunt, nec decens adeo ipsis decedit pondus, præcipue dentibus, qui aliàs multò sunt durabiliores. Ex istis itaque differentiis ritè examinatis, desumere possumus signa diagnostica fossilium figuratorum, num sint vel ex se genita seu sui generis; sin minus, num vel petrificata, vel calcinata: ut inde constituatur regula: Figurata ex se genita fossilia, graviora & minus

minus exacta sunt iis, quæ repræsentant. Quæ cum ita sint, non video, cur ossa *Canstadiensia* meri lusus Naturæ vocari possint.

§. VIII.

Sint etiam licet horum ipsorum ossium quædam graviora, quædam leviora; istud discrimen dependebit, vel 1^o. à diversitate ossium in se consideratorum, quatenus videlicet tibiæ pars media naturaliter est solidior ac densior, quàm versus articulum; maxillæ cortex, quàm pars interna; & dentium nucleus seu corona, quàm radix: imo omnium ossium dens est solidissimum, densissimum, omnem pene corruptionem eludens. Ut ita, quod mirum, dentes facilius animali superstite cariem contrahant, (præcipue in hominibus palato inservientibus,) quàm per plura secula humo concessi. *Incorrupti enim hoc hospite permanent, ut sint semina fructificaturi corporis in resurrectione, auctore Tertulliano L. de Resurrect. quem admodum Corn. Agrippa ex osiculo Sesamoideo maximo, defunctum hominem aliquando resuscitandum somniavit, ut habet Bartholinus, de luche animal. l. I. C. XIII.* Istas verorum ossium differentias ad amussim congruentes in nostris *Canstadiensibus* animadvertimus.

§. IX.

2^o. Ponderis diversitas quoque in ossibus (de quibus tractamus,) *Canstadiensibus*, dependet ab eo, quod alia plus, alia minus sunt petrificata. Notandum est enim, ossium compagem porosam, alcalinorum terrestrium ad instar, non tantum in ipso viventium corpore, acidas sanguinis particulas singulari quadam propensione & aptitudine, in salinas proprias, tanquam in ferro & magnete videmus, ultrò suscipere iisque assimilari, ut id egregiè notavit Nob. & Exc. D.D. Joh. Jac. *Ostwaldus* nostras, fautor mihi exoptatissimus, in Disputat. inaugurali, de Pædarthrocace, habitæ Basileæ anno 1687. thesi XIII.

Sed eandem operationem ossa retinere existimandum est, postquam terræ jam diu fuere demandata. Spongiosiora propterea, laxiora & porosiora, citius & facilius, quam compactiora, succum salinum figentem, seu si mavis, spiritum lapidescentem in sese imbibunt,

imbibunt, & nonnunquam longe aliam à pristina, constitutionem, laxioribus potissimum imprimunt; quod non adeò observatur in compactioribus, quæ facilius calcinantur successu temporis, quàm petrificantur.

§. X.

Istis differentiis ni fallor sufficienter prælibatis, disquirere quoque tenemur, quo pacto ossa sub terra augmentum capere possint. De lapidibus quidem non est, cur multis probem, num crescant. Crescunt revera, in adæquato loco detenti, iterumque suo tempore decrescunt, & in sabulum mutantur, continua rerum naturalium transmutationis lege. *Experientia convictus didici*, inquit *G. B. de S. Romain*, in *Physicæ scholasticis tricus liberatæ parte IV. cap. 22. magnam partem lapidum multiplicari, & crescere, secundum omnes suas dimensiones, & arenam mutari in conchas*. Et illustris *Peireskius*, qui instar omnium erit, (teste *Gassendo*, in vita ejus, anno 1630. pag 147.) non ea fuit sententia, ut existimaret, omnes lapides à mundi initio formatos: sed voluit, temporis progressu plerosque ita fieri, ut singuli originem debeant suæ materie, propriisque seminibus, configurationem verò partim ad naturam, partim ad casum referant acceptam. Nam cum omnium materies sit aqua, seu liquor, aut succus: existimavit, variis in locis contineri varia rerum semina, ac speciatim lapideum, quod liquori immistum, lactis instar ipsum coagulet, specialemque imprimat formam, cujusmodi & is indubitata exhibuit experimenta, *c. l. anni 1598. pag. II.* & cujusmodi mihi in scriniolis meis sunt specimina non rejicienda. Sed quid aliunde petimus, quod in nobismet ipsis invenimus? Nonne quoque corpus humanum latomias aliquando constituit? Hanc veritatem loquuntur historiæ & observationes passim multæ, quas inter legi merentur *Joh. Kentmanni* ad *Conr. Gesnerum*, de lapidibus in hominum cerebro, in tonsillis, in tumore sub lingua, in pulmonibus, in hepate, in folliculo felleo, in renibus, in vesica, in intestinis, in steatmate cruris, in vulneribus, in extremitatibus digitorum, & ubi non? generatis & adultis. Ut ita materia adæquata lapidum sit, quidquid habet poros &

E

foramina,

foramina, quæ succum lapidescentem seu acidum figens suscipere possunt; sive id in corpore viventium, sive in aquis, sive intra terram contineatur: vel, ut modernorum mos est loquendi: quorumcunque corpusculorum quies & mora, pressu elateris invicem insinuatorum, vel cuneatim nexorum, vel penetrantium, ab externo fluido, secretorum, opus hoc lapidescens absolvunt. Ab isto quoque principio suam existentiam agnoscunt frutices, arbores, animantia, ossa & alia, in lapideam consistentiam conversa.

§. XI.

Non quidem meam hic faciam passim divulgatam opinionem, de cornibus bœum, quæ circa Goam radices agere & crescere dicuntur: jocus enim subesse, quo Lusitanis illudunt, cum mulieres Goæ admodum luxuriosæ sint, demonstrare conatur Franciscus *Redi*, in Experimentis naturalib. pag. 162. seqq. licet in contrariam partem asserat *Borellus*, se cornua vervecina & bubula vidisse, quæ radices in terram egerant, *Cent. IV. observ. 52.* Sed animus saltem est, calamum ad genesin præcipue cornuum fossilium *Canstadiensium* adstringere: in ea enim totius rei cardo vertitur, & qua intricatissima feliciter expedita, reliqua ejus loci fossilia, facile suum invenient ortum. In illis quidem conquiescere potuissimus historicis monumentis, quæ parte priore proposuimus, quibus problematice probaremus, corniformia hæc corpora dentes elephantinos esse potuisse. Sed fateor, aliquot obstacula adhuc dum in mente mea nidulantur, quibus non nisi physicis subsidiis obviam iri posse cognosco. Est nempe major eorum quantitas, quam unquam uno in loco Germaniam vidisse Elephantem, sit existimandum: est magnitudinis eorum notabilis diversitas: & quod non Canstadii solum, sed etiam in aliis Germaniæ locis, ut prope Elbingerodam, prope Heidelbergam, Hildeshemium, item in Moravia, Silesia, Hassia, Saxonia, imo in ipsa Helvetia nostra, &c. non tantum olim, licet non tanta copia, sunt reperta, sed etiamnum aliquando reperiuntur. Contrarium quoque suadere videtur, horum fossilium corniformium passim prodeuntium, coloris, odoris, figuræ, consistentiæ & contentorum diversitas. Rem denique

denique ancipitem quoque reddere videntur, margæ *Consta-*
diensis exigua grana, striæ seu radii, tabellulæ & tubuli, quasi se-
mina essent, ex quibus, secundum quosdam, forte cornua hæc &
alia, concreverunt.

§. XII.

Ne itaque in aliam partem inclinantibus Naturæ mystis, meis
ultrò conceptis opinionibus tenaciter obstrepere videar, libentissi-
me concedo, quod singula ista corniformia corpora dentes ele-
phantini non fuerint, quoniam præter modo prolata argumenta,
etiam alios inter lapides, Osteocolli & Belemnites, non tantum si-
cut cornua animalium, curvi, à basi aliquousque cavi, sed etiam
odore ad cornu vel os ustum accedentes, inveniuntur, ut suo jam
tempore, solertissimus & immortalis gloriæ Medicus Tigurinus,
Conradus *Gesnerus* animadvertit, libro de figura lapidum, *Cap. I.*
fol. 8. b. & Cap. V. ab initio ferè. Quid autem, si statueremus, quod,
licet hæc corniformia, prope *Canstadium* detecta corpora, ossa vel
dentes, prout jam conformata, primò non fuerint, tamen sua in-
cunabula, suam existentiam suamve propagationem alio modo
animalibus hujusmodi, vel aliis debuerint? Nitrum revera, ille
Naturæ figulus, promotor fertilitatis & fecunditatis, licet tan-
quam Archæus terræ per se insit, tamen vis ejus plastica tandem
effeeta, non solum ab influxu continuo nitri aërei, sed etiam ma-
gis patenter ab urinis, fecibus & cadaveribus animalium continuo
instaurationatur.

§. XIII.

Quid ita dicendum erit, de istis animalium corporibus, quæ
prope *Canstadium* in terra calcario-nitrosa, cæteris paribus, per tot
secula delituere? In hunc sensum conspirantia Zachariæ *Theobaldi*
verba ut mea faciam, is lepide sic de calce refert: Der Kalch ist
ein Schalk / kan sich mit andern Bergarten und Bergsäfften / be-
freunden / bevettern / beschwägern / und in guter Nachbarschafft ver-
tragen / 2c. So ist er / liquefscens cum hydrargyro, ein solcher
Wurm / der sich hin und her drähet / windet / und etwas effigu-
riert /

riert/ nach dem sich die Materia als ein Ethon darzu bequemet/ &c. Arcanorum Naturæ Sect. XXI. pag. 156. seq. Nonne ex illis, ossa corruptioni haud succumbentia, primò quidem citius, tardius, pro eorum laxiori vel strictiori consistentia (quò ante demonstratum modo,) petrefieri, postmodum verò successivè quædam, ob pororum aptam dispositionem, (ut quoque de lapidibus antea explicavi,) augmentum capere, & adpositione particularum, in longum, latum & profundum crescere potuerunt, retenta quodammodo archetypi figura? Hoc minime paradoxum erit consideranti, lithophyta, pseudocorallia, juncum lapidescentem, &c. quæ intus ligno constant, à lapidescentis principii externi fluidi adpositione, successu temporis admodum augeri, & in arbusculas nonnunquam mutari, non relicta priore plantæ figura, cujusmodi plura specimina ante aliquot annos in Italiæ Gazophylaciis videre mihi datum est. Imò Anselmus *Bætius* refert, apud antiquarium Imperatoris se vidisse corallia variis coloribus, quorum furculi lignosi adhuc ex parte in corallium mutati erant, ita ut manifestè planta ipsa lignosa conspiceretur, & initium in ipsa corallii: *de lapid. & gemm. lib. II. Cap. CLIII.* Huc quoque referri potest, quod in agro Patavino ad Aponenses thermas, rotæ ligneæ molestrinarum, thermalibus illis aquis actæ, non multo tempore induant crustam lapideam candidam, quam molitores nonnunquam securi concussam, auferre tenentur, ne illæ pondere consistent; non secus ac in nostris regionibus brumali tempore glacie incrustatis succurrere tenentur.

§. XIV.

Ut itaque haud rarò in dentibus hominum ob victum minus exactum, (circa hoc vel præcipue ab aliorum viventium alimentis discrepantem, quod salinis particulis ut plurimum abundet,) tophus seu tartarus copiosus ita coalescit, ut ab ipsorum dentium substantia vix discerni ac divelli possit: ita etiam inter fossilia *Canstadiensia*, quæ ossa, dentes vel cornua, mollioris aut tenerioris fuerunt substantiæ, & convenientiori loco contenta, eò facilius quoque potuerunt sibi fluorem mineralem salino-nitrosam contrahere, & successivè tota mole augeri: ut quoque revera ipsum (quod dicitur) unicornu fossile, corpus progressivè auctum esse, lamellæ,

mellæ in quas est separabile, demonstraverint. Nec quoque desunt exempla dentium, qui humati creverunt. Sic in Miraculis mortuorum Henr. Kornmanni, Cap. XLII, memoratur, quod tempore Imperatoris Tiberii, in Sicilia cadavera aliquot mortuorum fuerint effossa, quorum dentes longitudine pedem viri superarint. Si quis itaque meam conjecturam in parte priore propositam, de dentium elephantinorum copia repudiare velit, haud rigoroſe obſtrepam: modo in eo consentiat, quod ſequitur. Cornuum bubulorum nuclei oſſei paſſim haud raro nobis occurrunt in locis incultis, ad ripas fluviorum, & qui ex ipſo fluviorum fundo nonnunquam extrahuntur, non tantum candidi inſtar gypſi, ſed etiam admodum ponderoſi: ita ut, niſi figura aliud ſuaderet, & multitudo pororum, quibus ſunt ſtipati, à foſſilibus terreſtribus vix diſtinguerentur. Quid itaque vetat ſuſpicari, quod iſta quoque corpora corniculatâ poroſa, poſſint exiſtere fundamentum magneticum cornuum foſſilium, uti aliorum locorum, ita etiam *Canſtadienſium*? non ſecus ac Joh. Riſtius, ſpongioſum os balenæ, ob poroſitatem ſuam, ſpiritûs univerſalis magnetem exiſtimavit, in ſua *Phœnice philoſophica*. Sic enim ſoli natalis nullum adæquatum locum ſibi requirit unicornu foſſile, ut non tantum effodiatur è terra, ſed etiam aliquando in fluviis reperiatur, ut id, quod ante annos in flumine Birſa prope Baſileam repertum, demonſtrat: Referatur huc ex parte priore, hecatombe, ſeu votivum C. Marii centum boum ſacrificium.

§. XV.

Sed, ne in immenſum creſcat Diſſertationis filum, dum oſſibus quoque ſub terra minerali contentis, creſcentem & ſeſe multiplicantem attribuo virtutem; concluſionis loco in ſubſidium voco, clariffimi Philoſophi Fortunii *Liceti* authoritatem, qui non tantum plantas ac animalia in terræ clauſtris, quoad figuras, reſuſcitari poſſe docet, dummodo eorum ramenta ſuperſint, eſſentiali ſole non deſtituta; ſed etiam aliquando ipſis artificialibus idem tribuere, non eſt veritus: Ut ex ramentis, inquit, cadaverum tam plantarum, quàm animalium, retinentibus in ſe quamvis labefactatam formam & eſſentia-

essentialem & accidentalem; ea forma potius est, in enascente spontaneo, consimilem formam producere, vel potius sese in pristinum statum revocare, ac de novo in conspectum dare: pari ratione labefactatae figurae portio, ac ratio quomodocunque servata in ramentis rerum artificiosarum & naturalium lapidescentibus, potest vel semel ipsam in aspectum prodere, vel aliam sibi consimilem in materia lapidis producere, lib. de Anulis antiquorum, Cap.V.

S. XVI.

Ne denique minimas etiam objecti nostri ditissimi negligamus circumstantias, ab ossibus *Canstadiensibus* maximis & elephantina designantibus, uno saltu, quod miraberis, ad murium descendimus ossa. Quid hinc locorum commercii, maximarum, quas fert tellus, belluarum, cum quadrupedum ferè minimis? Quodnam fatum post mortem conjunxit, quibus in vita nulla proportio, nullum consortium, nulla concordia? *Elephanti enim*, auctore *Plinio* lib.VIII.cap.X. l.8. *animalium maxime odere murem: & si pabulum in praesepio positum, attigi ab eo videre, fastidiunt.* *Myites* lapis, à similitudine muris dictus, *Kircher*o quidem innotuit, in Mundi subterr. tabula, tomo II. lib.8. cap.6. sed imagunculæ lapideæ cum murium ossibus nulla intercedit comparatio. De mure agresti, *Virgilius* in *Georgicis*:

Sub terra posuitq; domos, atque horrea fecit.

Sed nec ista poëtæ declaratio, omne fert punctum. Dum supra parte poster. §§. V. & VI. de spontaneo quorundam viventium ortu ex terra, vel terra & aqua, vel ipso aëre, dixissemus, mures quoque sub hunc censum revocavimus. Cujus assertionis ne nobis ultra experimenta desit authoritatis fulcimen, præter jam prolata, habebo sequentia: Murium generatio, mirabilis præter cætera animalia majorem in modum est, tum numero, tum celeritate. Jam enim foemina prægnante in vase miliario aliquando occupata, paulo post referato vase, musculi numero viginti & centum reperti sunt, *Aristoteles*. Mures *Norvegiæ* per tempestates & repentinos imbres ex aëre decedentes, & omnia virentia depascentes, prodit *Jacobus Zieglerus* in *Scandinaviæ* descriptione, & ex illo *Conradus Gesnerus*, de mure, pag.828. Si parit humus (in vineis) mures,

res,

res, minor fit vindemia, nisi totas vineas oppleveris muscipulis, quod in insula Pandatharia faciunt, *Varro de re rustica*, 1.8. In Thebaide Ægypti cum grandine pluit, mures in terra apparere audio, qui partim etiam nunc cœnum limosum, partim jam caro existunt, *Ælianus*, & qui hoc idem pluribus probant, *Gesnerus*, *Albertus*, *Diod. Siculus*, *Macrobius*, *Plinius*. Si propterea tam indeterminatus est murium ortus, ut non tantum per coitum ex utero, sed etiam per fermentationem extra uterum procreari possint, nescio, cur iidem (ut modo citati authores uno ore testantur,) falis gustu quoque imprægnari sine coitu, & ita speciem propagare nequeant. Vel itaque feri potuit, quatenus corruptio unius, est generatio alterius, ut mures, quorum ossa, majoribus in hac crypta interspersa reperiuntur, ex putrefactione majorum animalium, per quam aliàs salia essentialia proliciuntur, sint progeniti, cujusmodi plura apud physicos experimenta memorantur, & in eodem loco, ubi vitalitatem adepti, absumpta cadaverum carne, eorum alimento, mortem invenerint. Vel, (conjecturis locus est, si deficit absconditorum experientia,) hoc subterraneum cadaverum receptaculum, odore allicere quoque murium copiam, & postmodum casu obrutis, exitus præcludi potuit, quanquam ruinis imminetibus musculi præmigrare dicantur, *Plinio*, *Æliano*. Rationibus moniti, meliora sequemur. Licet enim hucusque probata, fatidica non fuerint, nec veridica fortè cuncta, haud tamen vanidica censenda confido.

Terentius Eun. act. I. sc. I.

---- *Incerta hæc, si tu postules
Ratione certa facere, nibilo plus agas,
Quam si des operam, ut cum ratione insanias.*

F I N I S.

